



**Gemeinsam Äntwert vum Här Minister fir sozial Sécherheet a vum Här Minister fir Famill an Integratioun op d'parlamentaresch Fro n°8111 vum 27. Juni 2023 vum honorabelen Deputéierten Här Max Hengel iwwer d'Ophaalen vun de finanziellen Allocatiounen nom Doud vun engem Kand mat Handicap**

Deelt d'Madamm Minister d'Meenung datt et sënnvoll wier déi finanziell Hëllefeneréischt no 6 Méint auslafen ze loossen fir datt déi betrafte Famillen nieft der Trauer net och nach mat finanzielle Schwieregkeeten ze kämpfen hunn ?

- Wann nee, aus wéi enge Grënn?

Am System vun der sozialer Sécherheet sinn d'Leeschtungen un de Beneficiaire gebonnen, also un déi individuell Rechter vum Beneficiaire. Dës kënnen Saach- oder Geldleeschtungen sinn.

An de Fäll, déi vum honorabelen Deputéierte mentionéiert ginn, sinn d'Beneficiairen d'Kanner déi d'Allocation spéciale supplémentaire kréien, net awer d'Eltere selwer.

Bei Geldleeschtungen kann de Beneficiaire, oder seng Famill, bezéiungsweis an de vum honorabelen Deputéierte mentionéierte Fäll d'Eltere vum Beneficiaire, decidéieren eng Persoun anzustellen, woubäi ze präziséieren ass dat d'Geldleeschtungen net e Salaire sinn, och net an der Fleegeversécherung.

Ewéi schonn an der Äntwert op d'parlamentaresch Fro n°7204 vum 17. November 2022 erkläert, sinn déi Geldleeschtungen weder e Salaire nach e Revenu de Remplacement fir den Aidant selwer, mee et ass eng Leeschtung, déi de Beneficiaire vun der Fleegeversécherung krit, wann dës Beneficiaire en Aidant huet. Dësen Aidant kann eng Persoun aus dem Familiären Ëmfeld sinn oder e Salarié, woubäi déi selwecht Konditiounen fir de Salarié ewéi fir den Aidant gëllen. Et ass also eng finanziell Leeschtung (Geldleeschtung) vun der Fleegeversécherung fir déi fleegebedierfteg Persoun déi hier Versuergung Doheem organiséiert.

Well d'Leeschtungen an der sozialer Sécherheet un de Beneficiaire selwer gekoppelt sinn, dës Leeschtungen also op individuelle Rechter baséieren, resultéiert doraus dat déi Leeschtungen, also och d'Allocation spéciale supplémentaire, mussen gestoppt gi wann de Beneficiaire leider verstierft.

D'Leeschtungen kënnen also net, esou ewéi vum honorabelen Deputéierte proposéiert, iwwer d'Verscheede vum Beneficiaire eraus bezuelt ginn.

Anerefalls misst dat prinzipiell bei all Leeschtung gemaach ginn a net nëmmen an de mentionéierte Fall, wat dann aner Froen mat sech bréngt an de Prinzip vun den individuell Rechter selwer a Fro stellt well déi Rechter de facto géifen op eng aner Persoun erweidert, bezéiungsweis transferéiert ginn.

Doriwwer eraus ass net all Situatioun identesch an eng pauschal Erweiderung vun de Rechter, zum Beispill vu 6 Méint ewéi vum honorabelen Deputéierte proposéiert, géif deenen individuell Situatiounen net gerecht ginn.



Am Fall wou awer eng “finanziell Noutsituatioun”, ewéi vum honorabelen Deputéierte mentionéiert, sollt entstoen, kënnen déi betraffe Persounen beim Office social vun hirer Gemeng Hëllef ufroe fir esou eventuell kënnen op aner Mesuren zeréckzegräifen.

Lëtzebuerg, den 17. August 2023

De Minister fir sozial Sécherheet

(s.) Claude Haagen